

合肥縣志卷第十四

賜進士出身廬州府合肥縣知縣左輔纂修

古蹟志

墳墓

坊表

寺觀附

合肥故城

寰宇記在城北漢置今無考

合肥新城

寰宇記三國魏揚州都督滿寵於城西

三十里依山築城謂之新城

按今雞鳴山北有故址圍三里共十八墩在城西

北事見滿寵傳

浚遒故城

江南通志在城東舊梁縣南三十里漢

浚遒縣故城也曹操伐吳重修亦曰曹城

按今龍城寺北有古城遺址寺在龍城集去城東偏北五十餘里

古滁陽城 江南通志在城東北寰宇記在慎縣東北六十四里遺址尚存吳赤烏十三年遣兵斷滁作堰以淹北道遂築此城

江南通志辨譌云據吳志其年遣兵十萬作堂邑涂塘在今爲全椒六合二縣界去合肥尚遠且晉志自合肥北至壽春悉屬魏時廬江郡之居巢襄安諸縣江津要害之地雖爲吳所據豈能越境築城於此當是魏人所築以備吳耳其言良是又北

魏於此城置南梁郡寰宇記云東晉置亦誤今其地在城東北百三十里名古城集遺址無

小峴城 江南通志在城東六十里蕭齊所築詳山水明府志梁韋叡侵魏拔小峴卽此

赭城 江南通志在城西北唐光啓二年壽州刺史張翺遣兵寇廬州楊行密將田頔敗之於赭城是也按赭新唐書作赭通鑑作赭未知孰是志於西北不言里數今址亦無考

界樓故城 寰宇記一名金牛城在縣西北五十里開皇五年立鎮置倉在廬壽二州界今廢

古慎城 寰宇記在縣西北四十一里楚白公邑春

秋哀公十六年吳人伐慎白公敗之卽此天下名勝

志弘治初店埠民修橋掘得石碣長三尺上鐫慎縣

界三字背刻少避長賤避貴六字

明朱國楨湧幢小品碑得於吳楚橋

按左傳杜氏注汝陰郡褒信縣西南有白亭是勝

之封邑應在今河南汝陽縣爲前漢汝南郡慎縣

劉宋南汝陰之慎縣乃僞置於浚遁非漢晉本縣

也寰宇記誤

梁縣城 江南通志在城東北七十里劉宋僞置慎

縣於浚遁趙宋又改慎縣爲梁縣從舊郡名也今爲

梁鄉

按此城非劉宋所置乃劉宋之後又改置者卽寰宇記當時之慎縣城也

梁王城 輿地紀勝在梁縣東六十里

魯王城 輿地紀勝在梁縣東七十里

按史傳無梁魯稱王事基址亦無考姑因紀勝錄之

古城 在城西北三十餘里牛寨寺北大十餘畝有土垣高七八尺中時掘得箭鏃居人傳係宋副總管牛皋破金齊兵扎寨處

桃花城 今在城南二十五里輿地紀勝云在城南四十里誤命名建置俱無考

清水鎮 輿地紀勝在梁縣北六十里自鎮至州九十里開禧用兵濠州寄治於此今梁鄉有清水橋卽其地

別虞橋 舊志在城東七十餘里俗傳西楚霸王別虞姬處又名鰈魚橋

飛騎橋 江南通志在城東門內舊名西津橋一名逍遙橋三國吳孫權爲魏張遼所襲乘馬越渡處

按水經注合肥城東有逍遙津水上舊有梁卽此

赤闌橋 在南城趙宋姜夔流寓處見姜集今無考
鎮淮樓 舊志古城北門宋郭振拓城基改爲譙樓
明嘉靖間知府龍誥重建有楊廉記載集文萬厯三
年知府吳道明重修題曰江淮保障崇禎十五年燬
於流賊 本朝康熙四年廬州道孫籀重建三十六
年知府張純修重新江南通志云樓上漏壺以銅爲
之

樓今在東城內二里凡三層高五丈三尺其下卽
金斗門尚有舊城基餘址高二丈四尺東西長二
十六丈中闊三丈四尺樓上銅壺已失有銅鐘一

厚三寸高五尺文云宋大中祥符八年造

五鳳樓 江南通志在東城上唐天祐中楊行密將

張崇建落成時有五色鳥集其上因名明崇禎八年
流賊寇城下知府吳大朴縱火燒賊風不順拜風風
迴賊遂退更名曰迴風樓卽今威武門城樓

鎮西樓 輿地紀勝在郡治斗梁城上今無考

思惠樓 舊志在府城隍廟後明正德十年知府徐
鉦建今燬有碑記載集文

四牌樓 舊名魁樓 舊志在鎮淮樓南先圯乾隆二十四

年知府王歲重建有碑記載集文嘉慶八年知縣左

輔重修

譙樓 在縣署頭門上明萬厯間知縣胡時化建知府葉逢春撤毀有明蔡悉記載集文

魁樓 在府學有明蔡悉記

砥柱樓 在時雍門外三里與文昌閣夾水爲鎮

稻香樓 在德勝門外西偏龔鼎亨建今舊基尚存

聖文祕奉閣 江南通志在城內宋劉筠知廬州構閣藏眞宗飛白書及所賜書額曰聖文祕奉之閣今無考

文昌閣 舊志在砥柱樓東南

來仙閣 在城內廖家巷永樂樓旁今圯

教弩臺 江南通志在城東門內九獅橋北曹操所

築教強弩以禦吳舟師今爲明教寺

子胥臺 舊志在城內梓潼觀西亦稱五相公臺今

爲玉虛觀府志集覽載錄異記云昔伍子胥諫吳王
死臨終戒其子曰吾當朝暮乘潮以觀吳之敗自是
海門山潮頭洶湧高數百尺越錢塘過漁浦方漸低
小朝暮再來時有見子胥乘素車白馬在潮頭之中
因立廟以祀廬州城內胥河岸上亦有子胥廟每朝
暮潮時胥河之水亦鼓怒而起至其廟前高一尺廣

十餘丈食頃乃定俗以爲與錢塘潮水相應焉

記爲唐杜光庭撰據此當更有廟或後廟廢止存臺也

明遠臺 江南通志在城東北七十里梁縣鄉四圍皆水方輿勝覽云宋鮑照嘗讀書於此舊志云趙宋張持正卽其地建俊逸亭今無

按基現爲舉人蔡邦燮書塾仍榜臺名

義門臺 江南通志在城西十八里唐萬敬儒三世同居親亡廬墓宣宗大中間特表其門舊志云臺今不存

節婦臺 江南通志在城內惠政樓東南宋包拯舊
第節婦拯長子縉妻崔氏也舊志云今名尚節樓在
鎮淮樓西南

樓奉大士像有僧守之康熙三十年廬州營守衛
高進忠捐北都五圖七甲坐落雙廟田一莊五十
六畝九分爲僧供乾隆五十四年重修俱有記

同食館 江南通志在南城上唐元和中刺史路應
建後改名建德館今廢唐陳鴻記載集文

馬忠肅公故宅 江南通志在城內和平橋東明成
化間通判董序改爲馬政公館後又改爲下察院今

廢爲民居

包孝肅公故宅

舊志在城內鳳皇橋巷今爲民居

詳香花墩下

余忠宣公故宅

江南通志卽今縣治明洪武中恩

桂坊尚存今廢

青陽山房

江南通志在城東南六十里巢湖北元

余忠宣公讀書處舊志云故址尚存有新安程文記

載集文

環翠山房

江南通志在城南湖右永樂港之原元

葛聞孫隱居講學之所今鳳皇墩卽其舊址

西巖書堂

江南通志在城東巢湖西岸宋安淮有

記舊志云今廢記佚

駙馬莊

舊志在城東四十里撮城鎮明宋忠順公

讀書處

按公名瑛尚成祖女咸寧公主

花園 江南通志在城南二十里元至正間宣讓王
遊賞之所其址尚存

按王名特穆爾布哈爲鎮南王托歡第四子初封
鎮南王文宗天歷初改封宣讓移鎮廬州

櫻桃園

輿地紀勝在藏舟浦今廢

宜園 在城西北李萬化墓側爲文定公廬墓處有知府張純修記載集文

三至堂 江南通志在府治西宋陳堯佐三守是邦故以名堂府志云在治內明弘治中知府馬金易名三錫有楊一清記載集文

安邊堂 方輿勝覽在州治

中和堂 輿地紀勝在葵廳後

凝香堂 輿地紀勝在中和堂後

雙瑞堂 輿地紀勝在凝香堂後

簡靜堂 輿地紀勝在合肥縣治

草堂 輿地紀勝在合肥縣治

雙杏堂 輿地紀勝在梁縣治

葵廳 府志在正堂後宋郭少保振建

日盍齋 輿地紀勝在雅歌堂後

自安邊堂以下九條今皆無考

景賢亭 江南通志在府治有宋晏殊包拯諸公詩
刻石贅壁間府志明知府馬金得晏清獻諸公餞歸
詩石刻於馬忠肅公故宅因并鐫包孝肅公戒廉五
律砌於壁今亭廢石刻存

威遠亭 江南通志在西城上明知縣熊文舉建有

記載集文

稅于亭 江南通志在東郊明知縣熊文舉建舊志云二亭俱廢

萬柳亭 輿地紀勝在西園

曲水亭 輿地紀勝在際慧寺西

綠野亭 輿地紀勝在梁縣

懷謝亭 輿地紀勝在郡圃

爛錦亭 輿地紀勝在郡圃

鳳鶴亭 輿地紀勝在鎮西樓西宋韓无咎記

春風亭 輿地紀勝在金斗門外

問柳亭

輿地紀勝在春風亭南

見山亭

輿地紀勝在春風亭東

寒碧亭

輿地紀勝在春風亭西

雲月亭

輿地紀勝在藏舟浦

衣錦亭

方輿勝覽在州治天禧中馬忠肅公守鄉

郡建輿地紀勝云有通判張君房記

自萬柳亭以下十二亭今皆無考其西園際慧寺

與張君房韓无咎記亦無考

樂賜亭

卽城隍廟拜亭明天順五年知府孟玘建

有記載集文

繼樂亭 在城南明弘治中知府馬金建有林瀚記

載集文

望梅亭 在餘峴口東俗傳魏武帝望梅止渴處妄
也未知何時人建

望湖亭 在大蜀山頂今圯

迴瀾軒 江南通志在香花墩包孝肅公祠內

藏舟浦 江南通志在金斗門外三國魏將張遼襲

吳藏戰艦於此寰宇記唐貞觀十年刺史杜公作斗

門與肥水相接浦內有島嶼花竹頗爲佳境輿地紀
勝劉貢父遊後浦新咏有從劉園至澄心寺卽此浦

也在今城內淺壩

箏笛浦 江南通志在城內后土廟側相傳曹操溺妓舟處陶靖節搜神後記云合肥口有一大白船覆在水中云是曹公船嘗有漁人夜宿旁以船係之但聞箏笛弦節之音又聲氣非常漁人夢人驅遣去云勿近公船此人驚覺卽移船去相傳云曹公載數妓船覆於此在水西門謝家壩側

逍遙津 詳飛騎橋下

金沙灘 舊志在藏舟浦內唐時杜刺史引肥水于其中李會詩云金沙灘上雙灘鴻肯爲分司御史來

卽此

小史港 舊志在城小東門內寰宇記合肥縣有小史港爲後漢末焦仲卿妻劉氏死所

按古詩爲焦仲卿妻作其序曰漢末建安中廬江府小史焦仲卿妻劉氏爲仲卿母所遣自誓不嫁其家逼之乃沒水而死仲卿聞之亦自縊於庭樹漢末廬江郡治初在舒後徙皖當在今桐城懷寧地皆與合肥無涉港俗名小猪又名小豕蓋豕史同音好事者因而附會小史吏職舊志改爲小吏亦非小東門卽今時雍門也

蜃潭 舊志在城西隍內水色黑四時不竭俗名黑

池壩

龍潭 輿地紀勝在梁縣治後乃滁水上源在河流之中去縣治不十步歷陽志載滁河水源出梁縣廳事之側有蜃母居焉每山水乍湔有物自江而入或露頭角羣漁從之漁者隨捕富於所獲

白公池 舊志在故梁縣因春秋時白公敗吳於慎而名卽今陷湖陂詳古慎城下

煉丹池 江南通志在城東七十里四頂山漢魏伯陽煉丹之所故址尚存

明萬厯間周公瑕得祕閣本督府參軍李塏邨重摹

上石

墳墓

五代

楊行密墓 在城西北六十里吳山廟集東昔人犁

田曾有見其隧道者俗謂墳爲山因以名廟

宋

知州劉筠墓 在水西門外筠仁宗時以翰林學士

知廬州

太子少保馬亮墓 在城西七里晏殊銘後廢明御

史楊瞻重立石

贈侍郎包令儀墓 在城東七里

參政包拯墓 在城東十五里自通判總以下皆附
葬有宋林至記載集文

元

學士葛聞孫墓 在水西門外

明

知府梁誨墓 在北門鹽汊誨洪武中知廬州

贈蔡國公張某墓 洪武中諭葬有衍聖公孔希學
記府縣志皆云忠毅公張德勝先墓不詳其名舊志

